




清刻龍藏佛說法變相圖

四經同卷

初十

佛說迦葉禁戒經

佛說犯戒罪輕重經

佛說戒消災經

佛說優婆塞五戒相經

佛說迦葉禁戒經

宋居士沮渠京聲譯

聞如是一時佛在舍衛國祇樹給孤獨園時
摩訶比丘千二百五十人菩薩萬二千人是
時佛語摩訶迦葉比丘言比丘有二事身墮
地獄中一者言是我所二者求人欲得供養
比丘復有二事一者及聽外道二者多欲積
衣被袈裟鉢比丘復有二事一者與白衣厚
善二者見好持戒沙門及嫉之比丘復有二
事墮鑊湯中一者常念愛欲二者喜交結知

友比丘復有二事一者自有過不肯悔二者
反念他人惡比丘復有二事當墮泥犁中一
者誹謗經道二者毀傷經戒比丘復有二事
一者於都犯戒二者於法中無所得比丘復
有二事悔一者強披法衣袈裟二者身不持
戒不承事持戒沙門比丘復有二事實難愈
一者心邪亂二者止人作菩薩道

佛語迦葉沙門何故正字沙門有四事爲沙
門一者形容被服像類沙門二者外如沙門
內懷諛諂三者但欲求索承事名譽自用貢
高四者行戒不犯是爲真沙門何等爲形容
被服者除鬚髮被法衣持應器心不自政但
欲作惡喜學邪道是爲外被服像類沙門內
諛諂者安徐而行徐出徐入外衣食羶惡內
欲甘美外居山間草茅爲廬內無信意自寬

賈若內嫉忠直從因緣多索財物成其承名
是爲諛諂不持戒不持戒者但欲令人稱譽
諛諂屏處欲令人稱譽不自剋責趨求度脫
但有諛諂之態是爲四事沙門不應何等爲
真沙門持戒行道不惜壽命捐棄身體不索
萬物不求供養若有比丘守空行者常觀淨
法本無瑕穢自作慧行不從他人得於佛法
中得泥洹是爲真沙門佛語迦葉欲求道當
於是真沙門莫於名沙門諛諂沙門譬如貧
人稱名大富但有富名內無所有佛問迦葉
是人應有不迦葉言不應佛言如是雖有沙
門名者不行沙門法如貧人稱大富譬如
有人爲水所沒漂及渴欲死沙門雖多諷誦高
才智慧不去情欲爲是情欲飢渴死坐是入
泥犁禽獸薛荔中譬如賢醫師滿一器藥不

能自愈其病雖多諷經不持戒譬如摩尼珠墮不淨中雖多諷經不持戒譬如死人著金銀珍寶身不持戒反著袈裟像類沙門譬如長者子被服莊飾著好新衣中外潔淨多諷經不持戒如是佛語迦葉有四事像持戒人何等四事一者有比丘禁戒所語言我不犯雖有是語爲有著自呼有入二者若有比丘悉知深經著行自言是我所行三者若比丘多著言是我所著四者自言我常行等心著恐懼於生死是爲沙門自稱譽爲持戒佛語迦葉禁戒無形不著三界無識無吾人無命無意無名無種無化無敦作者無所從來無所從去無形無滅無身無所犯無口無所犯無心無所犯無世間無計無世事無所住亦無戒亦無所念亦無敗壞是名爲禁戒是時

佛說禁戒無瑕穢亦無所著戒者無諸瞋恚安定就度世道如是爲持戒不愛身形不愛壽命亦不樂於五道悉曉了入於佛道中是爲持戒亦不在中亦不在邊不著亦不轉譬如虛空中風是爲持戒是乃名爲無種人有定心亦無所著亦無我爲天人相而曉是者是爲淨持戒不轉於禁戒不自貢高常欲守道持戒如是無有而過者耶無有是人信於空者隨佛所行不染汚從世間冥中入照入明適無所住立亦莫於三界是戒法佛說是戒法三萬三千諸天人民皆得須陀洹道入百沙門從是因緣意解得度行智慧如是

佛說迦葉禁戒經